

À NOSSE TOÛ D' RÎRE !

Lès Francès ont todi rî d' vos,
Nwâri l' walon qu' sèreut grossiér
Tot vos fiant passer po dès sots,
Djon.nias, bauchèles, omes ou coméres.
Li walon, qu'on n' fieut qu' dè l' causer,
D'après zèls, c'èsteûve on lingadje
Qui n'èsteut jusse bon qu'à canleter,
Disprîjî èt fé dès ramadjes.
Mins tot d'on côp i n'ont pus rî
Quand on s'a mètu à l' sicrîre ;
C'èst nos ratayons qu'ont cachî
À l' chaper, èt nin qu' po fé dîre.
Lès Francès ont yeû l'aîr choqués
Èt prétinde qu'on n' fieut qu' dès copîyes ;
Acèrtiner qu' po lès dobler
Nos n'aurin.n' nin todi aujîy.
Nin contint di s' place su lès "i",
Pwint fait dîre qui l' frâse èst tote faite,
S'i-gn-a deûs, qu'i n' faut nin machî
One bèle ratoûrnûre èt one laîde.
Mins tot scrîjant tot ç' qu'on-z-ètind,
On n' s'a nin r'toûrné après zèls :
Nos côpans l' mot avou on pwint
Ou mète one faflote à d'mwèsèle.
On lome ça scrîre à môde di djins
Dès pwints qu'on mèt j'qu'à ç' qui ça drane
Po r'mète " masculin, féminin "
Su l' minme pîd : roufion ou mayane ?
"Inclusive", c'èst l' nom qu'i donenut
Au moncia d' pwints, tot fiant d' leû yan' ;
À chipeléyes qu'i lès cosèmenut
Èt po fini d' compte tchaîr en pane.
Por on côp, rit'noz bin l' lèçon
Vos-ôtes, Francès, qui vout yèsse maîsse :
À môde di rin, lès p'tits Walons
Auront raîson quand on frè l' caîsse.

Albert Delvaux
Nôvimbe 2017